

Omnipreschent cun «Gian e Giachen»

Campagna da promoziun per il turissem grischun

DA GION NUTEGN STGIER / ANR

■ **Ils dus capricorns Gian e Giachen duaian carmalar anc daplis giasts en las regiuns turisticas dal Grischun. Passa set milliuns francs vegnan investads per las mesiras da marketing da Grischun Vacanzas cun ses differents partenaris. Singulas acziuns han gia cumenzà per frenar la sminuziun da las pernottaziuns.** La situaziun da partenza è la suandanta: Nagina destinaziun da vacanzas en Svizra ha gè quest onn fin uss ina usche gronda sminuziun tar las pernottaziuns sco il Grischun. Gist per 8% è sa reducidas las pernottaziuns en l'entir Grischun e las vistas per il proxim enviern e per la stad 2012 èn tut auter che bunas. Cun ina campagna massiva da reclama vulan Grischun Vacanzas e differents regiuns turisticas grischunas frenar quella sminuziun e cunzunt carmalar daplis giasts svizzers en noss chantun. Avant stgars quatter mais ha la regenza grischuna decidì da sustegnair Grischun Vacanzas cun ulteriurs 2,8 milliuns francs per la promoziun dal turissem. Vitiers è vegnì in ulteriur milliun francs dals differents partenaris da Grischun Vacanzas. L'uniun tetgala

dal turissem aveva gia en disposiziun 3,3 milliuns francs uschia che ussa stattan a disposiziun 7,3 milliuns francs per mesiras da reclama. 60% da quella summa stattan a disposiziun a Grischun Vacanzas e 40% da quels 7,3 milliuns francs duaian star a disposiziun per ils differents partenaris da l'uniun tetgala turistica da noss chantun. Quai è vegnì ditg ier a Cuira a chschun da la preschentaziun da la campagna da promoziun per il turissem grischun.

Gian e Giachen èn populars

Ier han Grischun Vacanzas e ses partenaris preschentà lur concept e lur ideas per carmalar daplis giasts la stagiun d'enviern che vegn e la stad 2012 en las regiuns da turissem da noss chantun. En il center da la campagna da marketing stattan vinavant ils dus capricorns Gian e Giachen. Cun quels dus capricorns ha Grischun Vacanzas dapi sis onns fatg bunas experientschas cun esser Gian e Giachen enconuscents tar vegl e giuven. *Gaudenz Thoma*, il «CEO» da Grischun Vacanzas, ha ditg che naging Svizzer e naging Svizra duaian vegnir sper il Grischun ora cura ch'el planisescha sias proximas vacan-



Er en l'avegnir duaian ils capricorns star en il center dal marketing da Grischun Vacanzas. Quai han confermà ier **Gieri Spescha (san.)**, il pledader da pressa da l'uniun tetgala turistica e **Gaudenz Thoma**, il director da Grischun Vacanzas.

FOTO G. N. STGIER



Gian e Giachen, ils dus capricorns, duaian far attent ils Svizzers al Grischun sco regiun da vacanzas. MAD

zas. Cun acziuns da reclama, saja quai placats, en las gasettas, en la televisiun ed en ils radios vulan ins esser omnipreschent cun ils dus capricorns Gian e Giachen. Cun els vulan ins cunzunt rinforzar la reclama en la Svizra tudestga ed en spezial en las regiuns da Son Gagl, Turitg e Basilea. La campagna da marketing ha gia ccumenzà e cuzza bunamain in onn.

Er las differents destinaziuns èn activas

Betg mo Grischun Vacanzas investescha ina bella summa en la campagna da reclama per il turissem, mabain er differents partenaris da l'uniun tetgala. Supplementar mettan differents destinaziuns da vacanzas a disposiziun in milliun francs. Gia cumenzà cun sia reclama supplementara ha la regiun da vacanzas Engiadina Scuol Samignun. 11 mesiras haja la destinaziun prevì, ha ditg *Martina Hännzi*, la manadra da marketing da quella regiun. Adiever fa quella destinaziun per sia reclama er

dals dus capricorns Gian e Giachen. Lai Turissem vul carmalar daplis giasts en la regiun cun 70 spots supplementars via ils canals electronics. En ina moda plitost humoristica fan ils dus capricorns Gian e Giachen attent a la regiun da vacanzas da Lai. Savognin Turissem e Savognin Pencilularas SA van sin il martgà cun ina acziun per famiglias. Uffants fin diesch onns van quest enviern gratuit cun skis a Savognin. Per quella acziun vegnan fatgs placats spezial natiralamain er cun ils dus capricorns populars. Cun bunas purschidas per famiglias e cunzunt cun ina reclama per la buna gastromomia vul Breil carmalar daplis Svizzers en la regiun da vacanzas. Cun in gieu auditiv da capricorns vul la Viafier retica far attent tuts a la particularitad da la «pitschna cotschna». Reclama cun ils dus capricorns vulan er far la scola auta «HTW» a Cuira e l'Academia Engiadina. Er l'Uniun da charn grischuna vul far en l'avegnir adiever dals dus capricorns Gian e Giachen per ses marketing